

Mid-Day Dogri News Bulletin,

04 August 2025 समे 12:25 hrs.

Loksabha

संसद दे बरसांती आहले इजलास दरान अज्ज लोकसभा ते राज्यसभा दौनें दी कार्यवाही च इक बारी फी विघ्न पेआ। विपक्ष आसेआ कीते गेदे हंगामे दे चलदे जित्थे लोकसभा दी कार्यवाही गी अज्ज दपैहरी दो बजे तोड़ी स्थगित करी दित्ता गेआ उत्थे गै राज्यसभा दी कार्यवाही गी कल दिनें 11 बजे तोड़ी स्थगित कीता गेआ ऐ। लोकसभा स्पीकर ओम बिरला होरें सब्भनें सांसदे गी गुजारश कीती ऐ जे ओहू सदन दी गरिमा बनाई रक्खन।

<><><><><><>

LG-Viksit Bharat

लेफ्टिनेंट गवर्नर मनोज सिन्हा होरें आखेआ ऐ जे 21मीं सदी, भारत दी सदी ऐ ते एहू गल्ल पत्थर दी लकीर ऐ। उ'नें आखेआ ऐ जे भारत, इक विश्व शक्ति दे रूप च अपनी स्थिति परतियै हासल करने लेई तेजिआ कन्नै अगड़ा बधा करदा ऐ ते साढ़ी युवा पीढ़ी इस जात्तरा च बड़ा बड़ा जोगदान देगा। एलजी होरें एहू गल्ल जम्मू युनिवर्सिटी दे विकसित भारत - युवा कनेक्ट प्रोग्राम दे समापन समारोह गी संबोधित करदे होई आखी। भारत गी 2047 तगर इक विकसित राष्ट्र बनाने दे नजरिये तैह्त्त युवाएं दे शक्तिकरण पर चेचा जोर दिंदे होई एलजी होरें नौजवाने गी गुजारिश कीती जे ओहू समाजी ते आर्थिक तब्दीलिये दी अगुवाई करने आहले बनन ते विकसित भारत दे लक्ष्य गी हासल करने लेई हर किश बलिदान करने गितै बी तैयार रौह्ना।

<><><><><><>

LG-Basohli Utsav

लेफ्टिनेंट गवर्नर मनोज सिन्हा होरें औंदी 28 सितम्बर थमां लेइयै 2 अक्तूबर तगर मनाए जाने आहले बसोहली उत्सव 2025 लेई कल राजभवन जम्मू च इश्तेहारी ब्रोशर ते टीज़र जारी कीता। एहू उत्सव बसोहली दी अनोखी संस्कृति ते कलाएं सरबन्धी विरासत दा जश्न मनाग ते एहू रामायण दिएं परंपराएं पर आधारित होग। इस उत्सव दुरान लोक कला सरबन्धी नमैशां, राश्ट्री नाच ते गीतें दे मुकाबले ते मुकामी खेड्डें दे आयोजन सने मुकामी कलाकारें गी सम्मानित बी कीता जाहग। एलजी सिन्हा होरें बसोहली दी पन्ध्यान गी बढावा देने लेई सभ्भनं सरबन्धत धडें दी सराहना करदे होई मशहूर बसोहली पेंटिंग दा बी जिक्र कीता जिसी 2023 च जीआई टैग हासल होआ हा। उंनं मुख्य भरै दे लोकें गी सादा दित्ता जे ओहू बसोहली उत्सव च हिस्सा लैने लेई पक्क गै औन।

<><><><><><>

Udh Airport Project

इलाकाई ब्हाई संपर्क गी बड्डे स्तरै पर बढावा देने दी कोशश तैहत् केन्द्री मंत्री डाक्टर जीतेन्द्र सिंह होरें एहू गल्ल सांझी कीती ऐ जे उधमपुर च ब्हाई अड्डे बनाने सरबन्धी परियोजना दा कम्म तेज रफ्तार कन्नै चला करदा ऐ। भारत दे ब्हाई अड्डे सरबन्धी प्राधिकरण नै उचित थाहै दा पता लाने लेई शोध दा कम्म सबूरा करी लैता ऐ ते इस सरबन्धै च औपचारिक प्रक्रियाएं गी रम्भी दित्ता गेआ ऐ। इस परियोजनाएं गी द'उं मरहलें च तोढ चाढेआ जाहग। पैहले गेड तैहत् मजूदा ढांचे दे कन्नै गै नागरिक डुआरिएं गी शुरु कीता जाहग ते मगरा दुए गेड तैहत् नमियां स्थूलतां विकसित कीतीआं जाडन। डाक्टर सिंह होरें आखेआ ऐ जे एहू ब्हाई अड्डा सुरक्षा दे लेहाज़ कन्नै बडे सामरिक महत्वै आहला होग ते एह्दे कन्नो-कन्नी एहू दूर-दरेडे इलाकें लेई जात्तरा दे लेहाज़ कन्नै बी बडा महत्वपूर्ण साबत होग। केन्द्री मंत्री होरें किश्तवाड दे ब्हाई अड्डे गी उडान योजना दे दायरे हेठ आहने दी उपलब्धि गी चेत्ता करदे होई आखेआ जे एहू गैंहू प्हाड़ी खित्तें च संपर्क उपलब्ध करोआने दी मजूदा सरकार दी मजबूत वचनबद्धता गी दर्शादी ऐ।

<><><><><><>

NCC-Camps

एनसीसी दी 3 जम्मू-कश्मीर बटालियन दा सालाना सिखलाई कैंप कल शुरू होआ। एहू कैंप उधमपुर च जोरावर ट्रेनिंग अकैडमी च लोअया जा'रदा ऐ जेदे च उत्तरी कश्मीर थमां कोई 285 कैडेट हिस्सा लै'रदे ना। 11 अगस्त तोड़ी चलने आहले इस कैंप दा मकसद हिस्सा लैने आहले कैडेटें च सेवा, अनुशासन ते नेतृत्व दी भावना गी बढ़ावा देना ऐ। इस कैंप गी समाजसेवा, सामुदायिक विकास, आपदा प्रतिक्रिया ते सामरिक सैन्य सिखलाई सरबंधी कौशल प्रदान करने लेई तैयार कीता गेदा ऐ तां जे कैडेट फौज दा अनुशासन ते लोकाचार दे मूल्यें गी अपनी जीवनशैली च अपनान।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कल 5 अगस्त गी दपैही साड्डे 12 बजे त्रिएं मिनटें दी इक बशेश परिचर्चा प्रसारित कीती जाहग जेहड़ी 5 अगस्त 2019 गी जम्मू-कश्मीर थमां दफा 370 ते 35ए हटाने दे बाद पिच्छले 6एं ब'रें च आई दिएं सकारात्मक तब्दीलिएं उप्पर आधारित होगा। इस बशेश कार्यक्रमै च साढे परौहने होडन साबका प्रशासनिक अधिकारी ते मन्ने-परमन्ने दे समाजी कार्यकर्ता श्री के.बी. जंडेयाल ते वरिष्ठ पत्रकार ते प्रेस क्लब जम्मू दे साबका प्रधान श्री अश्विणी कुमार जेहडे पिच्छले 6एं ब'रें दरान जम्मू-कश्मीर च आए दे सकारात्मक बदलावें पर अपने माहिराना बचार सांझे करडन। इस कार्यक्रम दा संचालन करडन साढे न्यूज़ एन्कर कुणाल श्रीवत्स ते विजय बजाज। इस कार्यक्रमै च तुस मीडियम वेव 303 मीटर यानि 990 किलोहर्ट्ज़, एफएम 100 इशारिया 3 मैगाहर्ट्ज़ ते 104 इशारिया 5 मैगाहर्ट्ज़ पर बी सुनी सकदे ओ।

<><><><><><>

Cricket

क्रिकेट च, भारत ते इंग्लैंड बश्कार जारी 5 टेस्ट मैचें आहली एंडरसन-तेंदुलकर प्रतियोगिता दा 5मां ते अखीरला टेस्ट मैच, बडे रोमांचक मोड़ पर आई पुज्जा ऐ। अज्ज इस मैच दे आखरी ध्याड़े मेजबान इंग्लैंड गी जित्त लेई छड़े 35 होर रन्ज चाईदे न जदके भारत गी जित्त लेई छड़ी 4 विकेटां होर हासल करनियां होङन। एह्दे शा पैहले कल चौथे ध्याड़े दा खेडू मुक्कने तोहडी इंग्लैंड नै अपनी दुई पारी च 6 विकेटें दे नुक्सान पर 3 सौ उनताली रन्ज बनाई लैते। इस श्रृंखला च फिलहाल इंग्लैंड 2-1 कन्नै अगगे ऐ ते जेगर भारत एहू मैच जित्ती लैदा ऐ तां एहू श्रृंखला 2-2 कन्नै बरोबर होई जाहग।

<><><><><><>